

Inatsisissatut siunnersuummut nassuiaatit

Nassuiaatit nalinginnaasut1. Aallaqqaasiut:

Piffissami 2010-p aasaaneraniit 2011-mi ukiarneranut Nunamut Namminermt, Pinngortitamut Avatangiisinullu Naalakkersuisoqarfiup avatangiisit innarlitsaaliorneqarnissaannik Inatsisartut inatsisissaannut missingiut nutaaq piareersarpaa. Missingiut taanna 2011-mi ukiakkut ataatsimiinnermi Inatsisartunut saqqummiunneqarpoq.

Nunamut Namminermt, Pinngortitamut Avatangiisinullu Naalakkersuisoqarfiup aamma Inatsisartut Allattoqarfiata inatsisissamat missingiutip kalaallisua qallunaatuualu misissoraluaraat kingusinnerusukkut paasineqarpoq inatsisip oqaasertai, Inatsisartunut saqqummiunneqartut akuersissutigineqartullu kalaallisut qallunaatullu assigiissimanngitsut.

Inatsimmut allannguutissatut siunnersuummi matumani inatsimmi paragraffit assigiilernerit qulakkeerneqarpoq.

2. Siunnersuummi immikkoortoq pingaarneq:

Allannguutissatut siunnersuuteqarnermut pissutaavoq avatangiisit innarlitsaaliorneqarnissaannik Inatsisartut inatsisaata nr. 9, 22. november 2011-meersup akuersissutigineqartup kalaallisuuata qallunaatuatalu assigiinnginneri, tassa kukkunikkut § 68-imi immikkoortoq 2 inatsisip kalaallisoortaani mininneqarsimammat.

Inatsisip oqaasertaata qallunaatuani § 68, imm. 2-mi aalajangersarneqarpoq inatsit malillugu akiliisitaanerit eqqartuussissutigineqartut Nunatta karsianut tutsinneqassasut. Aalajangersagaq taanna inatsisip oqaasertaasa kalaallisoortaani nassaarineqarsinnaangilaq. Inatsisip oqaasertaasa taakku marluk akornanni naapertuuttoqanngippat inatsisip oqaasertai kalaallisut allaqqasut atuuttussaapput.

Inatsit malillugu akiliisitsinerit Nunatta karsianut tutsinneqartussaanerit pillugit inatsit aalajangersakkamik imaqaanngippat akiliisitsinerit naalagaaffiup karsianut tutsinneqartussaassapput. Siunnersuummi taamaattumik inatsit malillugu akiliisitsiniarnerit nunatta karsianut tutsinneqarnissaat qulakkeerniarneqarpoq.

3. Pisortanut aningaasaqarnikkut allaffissornikkullu kingunissai:

Inatsisartut inatsisaat malillugu akiliisitaasoqartillugu akiliutit Nunatta karsianut iluaqutaalersinnaanerit siunnersuummi qulakkeerniarneqarpoq.

4. Inuussutissarsiortunut aningaasaqarnikkut allaffissornikkullu kingunissai:

Siunnersuut inuussutissarsiortunut aningaasaqarnikkut allaffissornikkullu kinguneqartitsissanngilaq.

5. Avatangiisinut, pingortitamut inuillu peqqissuunerinut kingunissai:

Avatangiisinut, pingortitamut inuillu peqqissuunerinut siunnersuut kinguneqartitsissanngilaq.

6. Innuttaasunut kingunissai

Siunnersuut innuttaasunut aningaasaqarnikkut allaffissornikkullu kinguneqartitsissanngilaq.

7. Kinguneqartitsinerit allat annertuut

Siunnersuut kinguneqartitsinerinik allanik annertuunik kinguneqartitsissanngilaq.

8. Naalagaaffeqatigiinnermut aamma Namminersorlutik Oqartussanut tunngasut:

Siunnersuutip Naalagaaffeqatigiinnermut imaluunniit Namminersorlutik Oqartussanut tunngasutigut kinguneqartitsinissaa naatsorsuutigineqanngilaq.

8. Tusarniaaneq:

Inatsisissatut siunnersuummi Inatsisartut inatsisaata akuerineqareersimasup kalaallisoortaata iluarsineqarnera kisimi pineqarmat siunnersuut tamanut tusarniutigineqarsimanngilaq. Taamaattorli siunnersuut tusarniutigineqanngikkaluarluni Namminersorlutik Oqartussani Naalakkersuisoqarfinnut, KANUKOKA-mut aamma GA-mut saqqummiunneqarpoq.

9. Tusarniaanermi akissutit:

Siunnersuut uku oqaaseqarfigaat:

Namminersorlutik Oqartussani Inatsisileriffik	Aalisarnermut, Piniarnermut, Nunalerinermullu Naalakkersuisoqarfik
Kalaallit Nunaanni Sulisitsisut Peqatigiiffiat (GA)	KANUKOKA
Peqqissutsimut Naalakkersuisoqarfik	Ineqarnermut, Attaveqarnermut Angallanermullu Naalakkersuisoqarfimmi Teknikimut Nunamullu Pilersaarusionermut Immikkoortortaqarfik

Ataani oqaaseqaatit aqqusaartorneqarneri saqqummersinneqarput:

Kalaallit Nunaanni Sulisitsisut Peqatigiiffiat (GA) akissummini oqaaseqaateqanngilaq. Namminersorlutik Oqartussani Inatsisileriffik akissummini oqaaseqaateqanngilaq. Peqqissutsimut Naalakkersuisoqarfiup allanngortitsinissaq isumaqatigaa. Nunamut Pilersaarusionermut Immikkoortortaqarfiup allanngortitsinissaq isumaqatigaa. Aalisarnermut, Piniarnermut, Nunalerinermullu Naalakkersuisoqarfik nassiunneqartunut oqaaseqaatissaqanngilaq. KANUKOKA isumaqarpoq aalajangersagaq iluarsineqartariaqartoq.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Inatsisissatut siunnersuummi § 68 imm. 2-mit soorlu takuneqarsinnaasoq Inatsisartut inatsisaat taanna malillugu akiliisitaanerit eqqartuussissutigineqartut Nunatta karsianut tutsinneqartassasut erseqqissarneqarpoq.